



Broj: 09-02-3755/23
Sarajevo, 7. 3. 2024. godine

BOSNA I HERCEGOVINA
PARLAMENTARNA SKUPŠTINA
Trg BiH broj 1
SARAJEVO

BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO:		07-03-2024	
Organizaciona jedinica	Klasifikaciona oznaka	Redni broj	Broj priloga
01,02	02-1-532/24		

M¹⁵
B

PREDMET: Prijedlog zakona o sprječavanju sukoba interesa u institucijama na razini Bosne Hercegovine, dostavlja se

Veza akt Generalnog tajništva Vijeća ministara Bosne i Hercegovine naš Broj: 05-07-1-574-1/24 od 6.3. 2024. g.

Vijeće ministara Bosne i Hercegovine je Ministarstvu pravde Bosne i Hercegovine dostavilo akt broj: 05-07-1-574-1/24 od 6.3. 2024. g. kojim obavještava Ministarstvo pravde Bosne i Hercegovine da je na 26. izvanrednoj telefonskoj sjednici razmotrilo Nacrt Zakona o sprječavanju sukoba interesa u institucijama na razini Bosne i Hercegovine - Novi usuglašeni tekst od 06.3.2024.godine.
S tim u vezi, zaključeno je da se:

-Usvaja prijedlog Zakona o sprječavanju sukoba interesa u institucijama na razini Bosne i Hercegovine- Novi usuglašeni tekst od 06.3.2024.godine;

-Zadužuje se Ministarstvo pravde Bosne i Hercegovine da prijedlog predmetnog Zakona dostavi Parlamentarnoj skupštini Bosne i Hercegovine uz prijedlog da se razmatra po žurnom zakonodavnom postupku, u skladu sa poslovničkim odredbama oba doma Parlamentarne skupštine Bosne i Hercegovine, jer je prijedlog označen oznakom „EI“

-Istodobno predlagač je obavezan da u prapratnom dopisu obrazloži razmatranje prijedloga navedenog zakona po žurnom postupku.

Slijedom navedenog, u prilogu dostavljamo Prijedlog Zakona o sprječavanju sukoba interesa u institucijama na razini Bosne i Hercegovine- Novi usuglašeni tekst od 06.3.2024.godine, na tri službena jezika i dva pisma koja su u službenoj uporabi u Bosni i Hercegovini, u pisanom i elektroničkom obliku, zatim:

- Izvjeshće o održanim javnim konzultacijama s zainteresiranom javnošću, održanim u razdoblju od 11. 5. do 13. 6. 2023. godine, sukladno članku 21. Pravila za konzultacije u izradi pravnih propisa („Službeni glasnik BiH“, broj 5/17) od 3. 7. 2023. godine;
- Izjavu o održanim javnim konzultacijama s zainteresiranom javnošću, sačinjenu sukladno članku 22. Pravila za konzultacije u izradi pravnih propisa;
- Prethodnu procjenu utjecaja propisa (Obrazac 1A);

- Mišljenja Ureda za zakonodavstvo, broj: 04-02-1-424/23 od 5.3. 2024.godine;
- Mišljenje Direkcije za evropske integracije, broj: 03/A-06-2-MV-629-3/23 od 5. 3. 2024. godine;
- Mišljenje Ministarstva financija i trezora Bosne i Hercegovine, broj: 05-02-2-4583-2/23 od 19. 6. 2023. godine, s potpisanim Obrascem 2A-o fiskalnoj procjeni utjecaja propisa;
- Mišljenje Agencije za prevenciju korupcije i koordinaciju borbe protiv korupcije, broj: 05-14-1-350/23 od 12.6.2023. godine, i
- Mišljenje Agencije za zaštitu osobnih podataka, broj: 03-1-02-1-492-2/23 od 2. 6. 2023.godine.

Predlažemo da Parlamentarna skupština Bosne i Hercegovine razmatra Prijedlog zakona o sprječavanju sukoba interesa u institucijama na razini Bosne i Hercegovine- Novi usuglašeni tekst od 6.3.2024. g. po žurnom zakonodavnom postupku, sukladno odredbama članka 134. stavak (1) Poslovnika Zastupničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20 i 53/22) i članka 125. stavak (1) Poslovnika Doma naroda Parlamentarne skupštine Bosne i Hercegovine („Službeni glasnik BiH“, br.58/14, 88/15, 96/15 i 53/16).


Razlozi za ovakav prijedlog su prije svega u činjenici da se radi o propisu koji je predmetom usuglašavanja s odgovarajućim standardima EU, kao i priznatim međunarodnim praksama u oblasti sukoba interesa, iz kog razloga nosi oznaku „EI“.

Posebno napominjemo da je, nakon što je Bosna i Hercegovina dobila preporuku Europske komisije za kandidatski status, obvezana poduzeti niz koraka među kojima je i usvajanje Zakona o sprječavanju sukoba interesa u institucijama na razini institucija Bosne i Hercegovine.

Predložena rješenja u Prijedlogu zakona predstavljaju pomak u ispunjenju preporuka i sveukupno doprinose realiziranju obveza Bosne i Hercegovine ka članstvu u Europskoj uniji, sukladno preuzetim obvezama iz Sporazuma o stabilizaciji i pridruživanju.

S poštovanjem,

Privitak: Kao u tekstu
Dostavljeno:
- Naslovu,
- u spis.



PRIJEDLOG
„P.Z.E.I.“

Na osnovu člana IV 4.a) Ustava Bosne i Hercegovine, Parlamentarna skupština Bosne i Hercegovine na - sjednici Predstavničkog doma, održanoj _ . _ . 2024. godine i na sjednici Doma naroda, održanoj _ . _ . 2024. godine, usvojila je

ZAKON

O SPREČAVANJU SUKOPA INTERESA U INSTITUCIJAMA NA NIVOU BOSNE I HERCEGOVINE

DIO PRVI

Član 1.

(Predmet Zakona)

Zakonom o sprečavanju sukoba interesa u institucijama na nivou Bosne i Hercegovine (u daljnjem tekstu: Zakon) uređuju se posebne obaveze nosilaca javnih funkcija u institucijama na nivou Bosne i Hercegovine u obavljanju javne funkcije, obaveze podnošenja i sadržaj izvještaja o finansijskom stanju i imovini nosilaca javnih funkcija, nadležnost za provođenje Zakona, osnivanje Komisije za odlučivanje o sukobu interesa u institucijama na nivou Bosne i Hercegovine (u daljnjem tekstu: Komisija), postupak pred Komisijom, mjere za povredu Zakona, kao i druga pitanja od značaja za provođenje ovog zakona.

Član 2.

(Cilj Zakona)

Cilj Zakona je sprečavanje sukoba interesa u obavljanju javne funkcije, sprečavanje privatnih uticaja na donošenje odluka u obavljanju javne funkcije, jačanje integriteta, objektivnosti, nezavisnosti, nepristrasnosti i transparentnosti u obavljanju javne funkcije, prevencija i borba protiv korupcije, te jačanje povjerenja građana u institucije na nivou Bosne i Hercegovine.

Član 3.

(Upotreba muškog i ženskog roda)

Riječi koje su radi preglednosti u Zakonu navedene u jednom rodu bez diskriminacije se odnose na muški i na ženski rod.

Član 4.

(Definicija)

U smislu ovog zakona:

- a) „nosilac javne funkcije u institucijama na nivou Bosne i Hercegovine“, (u daljnjem tekstu: nosilac javne funkcije) je izabrano ili imenovano lice, rukovodilac u instituciji na nivou Bosne i Hercegovine, rukovodilac u pravnom licu koje osniva institucija na nivou Bosne i Hercegovine, rukovodilac u pravnom licu koje u skladu sa zakonom Bosne i Hercegovine vrši javna ovlaštenja, odnosno djelatnosti od javnog interesa, kao i rukovodilac ili lice na čiji izbor ili imenovanje saglasnost daju Parlamentarna skupština Bosne i Hercegovine, Predsjedništvo Bosne i Hercegovine i Vijeće ministara Bosne i Hercegovine, rukovodilac u instituciji na nivou Bosne i Hercegovine koji je u statusu državnog službenika sekretara s posebnim zadatkom, kao i šef kabineta, savjetnik izabranog ili imenovanog lica, rukovodioca u instituciji na nivou Bosne i Hercegovine, rukovodioca u pravnom licu koje osniva institucija na nivou Bosne i Hercegovine, rukovodioca u pravnom licu koje u skladu sa zakonom Bosne i Hercegovine vrši javna ovlaštenja, odnosno djelatnosti od javnog interesa, kao i rukovodioca ili lica na čiji izbor ili imenovanje saglasnost daju Parlamentarna skupština Bosne i Hercegovine, Predsjedništvo Bosne i Hercegovine i Vijeće ministara Bosne i Hercegovine;
- b) „ovlašteno lice“ je lice koje je osnivačkim aktom ili drugim aktom preduzeća ovlašteno da predstavlja i zastupa preduzeće, kao i poduzetnik, odnosno fizičko lice koje samostalno na tržištu obavlja djelatnosti radi sticanja dobiti;
- c) „bliski srodnik“ je bračni drug, vanbračni drug, dijete, majka, otac, usvojitelj i usvojenik nosioca javne funkcije;
- d) „povezano lice“ je bliski srodnik, srodnik u pravoj liniji, srodnik u pobočnoj liniji do trećeg stepena, srodnik po tazbini do drugog stepena ili drugo lice koje je s nosiocem javne funkcije u bliskoj prijateljskoj, političkoj, ekonomskoj, poslovnoj vezi;
- e) „ulaganje kapitala“ je ulaganje novca, stvari i prava u vlasničku strukturu preduzeća;
- f) „finansijski interes“ je svaki interes kojim se nosiocu javne funkcije omogućava da primi novac u vrijednosti većoj od 1.000 KM godišnje, te svaki vlasnički interes koji odgovara vrijednosti od najmanje 10.000 KM u nekom privrednom društvu;
- g) „lični interes“ je imovinska i neimovinska korist nosioca javne funkcije i povezanog lica;
- h) „poklon“ je novac, stvar, pravo i usluga izvršena bez odgovarajuće naknade i svaka druga korist koja je data nosiocu javne funkcije ili povezanom licu, u vezi s vršenjem javne funkcije;
- i) „privatno preduzeće“ je svako zakonom registrovano privredno društvo, koje nije javno preduzeće;
- j) „javna funkcija“ je posao izabranog ili imenovanog lica, rukovodioca u instituciji na nivou Bosne i Hercegovine, rukovodioca u pravnom licu koje osniva institucija na nivou Bosne i Hercegovine, rukovodioca u pravnom licu koje u skladu sa zakonom Bosne i Hercegovine vrši javna ovlaštenja, odnosno djelatnosti od javnog interesa, rukovodioca i lica na čiji izbor ili imenovanje saglasnost daju Parlamentarna skupština Bosne i Hercegovine, Predsjedništvo Bosne i Hercegovine i Vijeće ministara Bosne i

Hercegovine, kao i rukovodioca u instituciji na nivou Bosne i Hercegovine, koji je u statusu državnog službenika sekretara s posebnim zadatkom, kao i šefa kabineta i savjetnika iz tačke a) ovoga člana;

- k) „organ vlasti“ je organ zakonodavne i izvršne vlasti Bosne i Hercegovine, organ zakonodavne i izvršne vlasti Federacije Bosne i Hercegovine, organ zakonodavne i izvršne vlasti Republike Srpske, organ zakonodavne i izvršne vlasti Brčko distrikta Bosne i Hercegovine, organ zakonodavne i izvršne vlasti kantona u Federaciji Bosne i Hercegovine, gradsko i općinsko vijeće, gradonačelnik i načelnik općine u Federaciji Bosne i Hercegovine, skupština grada i općine, gradonačelnik i načelnik grada i općine u Republici Srpskoj;
- l) „lična usluga“ je svako djelovanje kojim se jedna strana obavezuje da obavi određeni posao, a da druga strana za obavljanje tog posla pruži materijalnu ili nematerijalnu korist ili naknadu, koja ne proizlazi iz radnog odnosa;
- m) „institucija na nivou Bosne i Hercegovine“ je svaka institucija na nivou Bosne i Hercegovine osnovana Ustavom, zakonom Bosne i Hercegovine i drugim propisima;
- n) „javno preduzeće“ je preduzeće osnovano u skladu s propisima kojima je uređeno osnivanje javnih preduzeća u Bosni i Hercegovini;
- o) „sukob interesa“ predstavlja situaciju u kojoj nosilac javne funkcije ima privatni interes koji kao takav utiče, može uticati ili se stvara utisak da utiče na zakonitost, transparentnost, nepristrasnost i objektivnost u obavljanju javne funkcije.

DIO DRUGI

POGLAVLJE I OBAVEZE I ODGOVORNOSTI

Član 5.

(Obaveze i odgovornosti nosilaca javne funkcije)

(1) Nosilac javne funkcije, u obavljanju javne funkcije dužan je postupati zakonito, odgovorno, nepristrasno, savjesno, pošteno, časno i efikasno, pridržavajući se principa odgovornosti, poštenja, savjesnosti, otvorenosti i vjerodostojnosti.

(2) Nosilac javne funkcije je lično odgovoran za svoje djelovanje u obavljanju javne funkcije na koju je imenovan, odnosno izabran, i odgovoran je organu koji ga je imenovao ili izabrao.

(3) Nosilac javne funkcije ponaša se savjesno i odgovorno, poštuje zakonske i druge propise kojima se uređuju prava, obaveze i odgovornosti u obavljanju javne funkcije.

(4) U obavljanju javne funkcije nosilac javne funkcije mora čuvati vlastitu vjerodostojnost i dostojanstvo povjerene javne funkcije.

(5) U obavljanju javne funkcije nosilac javne funkcije ne smije svoj privatni interes i interes povezanih lica stavljati iznad javnog interesa.

(6) Nosilac javne funkcije ne smije koristiti javnu funkciju za ličnu dobit i dobit lica koje je s njim povezano.

(7) Nosilac javne funkcije, kao javno lice, djeluje u interesu građana.

(8) U obavljanju javne funkcije nosilac javne funkcije obavezan je imovinu, sredstva za rad i finansijska sredstva koja su mu povjerena koristiti na efikasan način i isključivo u svrhu za koju su namijenjena.

(9) Nosilac javne funkcije za vrijeme obavljanja javne funkcije prima plaću i naknadu za funkciju koju obavlja, u skladu sa zakonskim propisima o plaćama i naknadama zaposlenih u institucijama Bosne i Hercegovine i drugim propisima.

Član 6.

(Nespojivost, obavljanje druge funkcije i drugog posla)

(1) Nosilac javne funkcije obavlja samo jednu javnu funkciju, osim ako je zakonom i drugim propisom drugačije propisano.

(2) Odredba iz stava (1) ovog člana odnosi se na zabranu obavljanja druge javne funkcije nosioca javne funkcije u odnosu na druge nivoe vlasti u Bosni i Hercegovini, kako je definisano zakonima kojima se uređuje materija na tim nivoima vlasti.

(3) Za vrijeme obavljanja javne funkcije koja podrazumijeva rad s punim radnim vremenom nosilac javne funkcije ne može obavljati drugi posao.

(4) Izuzetno od stava (3) ovog člana, nosilac javne funkcije može se baviti naučnim, nastavnim, kulturnim, umjetničkim i sportskim radom i sticati prihode od autorskih, patentnih prava, intelektualne i industrijske svojine, ukoliko bavljenje ovim djelatnostima ne dovodi do sukoba interesa.

(5) Članstvo nosioca javne funkcije u upravnom odboru, nadzornom odboru, skupštini, upravi ili menadžmentu, ili u svojstvu ovlaštenog lica u javnom preduzeću nespojivo je s obavljanjem javne funkcije.

(6) Članstvo nosioca javne funkcije u stalnom ili povremenom radnom tijelu, komisiji koju osniva institucija na nivou Bosne i Hercegovine, ne smatra se vršenjem dviju ili više javnih funkcija.

Član 7.

(Nespojivosti u odnosu na privatna preduzeća)

(1) Nosilac javne funkcije za vrijeme obavljanja javne funkcije ne može biti član skupštine, nadzornog odbora, uprave ili menadžmenta, biti u svojstvu ovlaštenog lica, niti imati bilo kakav finansijski interes, što uključuje i pružanje ličnih usluga, u bilo kojem privatnom preduzeću kojem je organ vlasti davao bilo kakve podsticaje i olakšice, uključujući i kreditna sredstva, u iznosu većem od 10.000 KM na godišnjem nivou.

(2) Nosilac javne funkcije ne može biti član skupštine, nadzornog odbora, uprave ili menadžmenta, biti u svojstvu ovlaštenog lica ili imati finansijski interes, što uključuje i pružanje ličnih usluga, u bilo kojem privatnom preduzeću koje sklapa ugovore ili na drugi način posluje s institucijama i organima koji se finansiraju iz budžeta na bilo kojem nivou u Bosni i Hercegovini. Ova odredba primjenjuje se na privatna preduzeća koja su sklopila ugovor ili posluju s institucijama i organima koji se finansiraju iz budžeta u iznosu većem od 10.000 KM na godišnjem nivou.

(3) Nosiocem javne funkcije iz st. (1) i (2) ovog člana ne smatra se član skupštine privrednog društva koji je vlasnik manje od 1% kapitala.

Član 8.

(Dužnost nosioca javne funkcije na podnošenje ostavke)

(1) Nosilac javne funkcije dužan je podnijeti ostavku na svaku od nespojivih i nedozvoljenih funkcija i poslova, najkasnije u roku od osam dana nakon preuzimanja javne funkcije.

(2) Ako Komisija utvrdi da nosilac javne funkcije obavlja drugu funkciju i provodi aktivnosti suprotno odredbama čl. 6. i 7. ovog zakona, naložit će nosiocu javne funkcije da prestane s obavljanjem druge funkcije ili aktivnosti, u roku od 15 dana od dana prijema odluke Komisije.

(3) Ukoliko nosilac javne funkcije ne postupi po odluci Komisije iz stava (2) ovog člana, Komisija će u roku od 15 dana pokrenuti postupak za utvrđivanje povrede odredbi ovog zakona.

POGLAVLJE II ZABRANA

Član 9.

(Zabrana djelovanja nosioca javne funkcije u slučaju mogućeg sukoba interesa)

(1) Nosilac javne funkcije dužan je odmah po saznanju o mogućem sukobu interesa pisanim putem obavijestiti Komisiju o nastaloj situaciji.

(2) Nosiocu javne funkcije zabranjeno je poduzimanje bilo koje službene radnje, učestvovanje u raspravi, glasanju ili odlučivanju o pitanju koje je u vezi s ličnim i finansijskim interesom njega ili povezanog lica.

(3) Zabrana iz stava (2) ovog člana ne odnosi se na raspravljanje i glasanje o zakonima i drugim općim pravnim aktima.

Član 10.

(Dužnost nosioca javne funkcije u slučaju mogućeg sukoba interesa)

(1) Komisija je dužna dostaviti obrazloženo mišljenje nosiocu javne funkcije na pisanu obavijest iz člana 9. stav (1) ovog zakona, u roku od osam dana od dana dostavljanja obavijesti.

(2) Ako Komisija, po pisanoj obavijesti nosioca javne funkcije, u mišljenju konstatuje postojanje sukoba interesa iz ovog zakona, nosilac javne funkcije je dužan konkretan posao ustupiti drugom zakonom ovlaštenom licu, a ako nema zakonom ovlaštenog lica, odluku će donijeti neposredno nadređeni nosiocu javne funkcije.

Član 11.

(Poslovi nosioca javne funkcije u nevladinim, neprofitnim organizacijama)

(1) Za vrijeme obavljanja javne funkcije, nosilac javne funkcije ne može obavljati dužnost ovlaštenog lica u udruženju i fondaciji osnovanim u skladu sa zakonima o udruženjima i fondacijama, a koji se finansiraju iz budžeta bilo kojeg nivou vlasti u Bosni i Hercegovini, u iznosu većem od 20.000 KM godišnje, odnosno u iznosu većem od 70.000 KM godišnje u udruženju i fondaciji iz oblasti sporta.

(2) Izuzetno od stava (1) ovog člana, nosilac javne funkcije može obavljati izvršnu funkciju u udruženju i fondaciji, koje se ne finansiraju iz budžeta bilo kojeg nivoa vlasti u Bosni i Hercegovini.

(3) Nosilac javne funkcije koji je član, predsjednik, direktor ili član organa upravljanja i nadzornog organa udruženja i fondacije osnovanih u skladu sa zakonima o udruženjima i fondacijama, ne može primati naknadu za rad u organu te organizacije, izuzev naknade putnih i opravdanih materijalnih troškova.

Član 12.

(Angažman bliskog srodnika)

Do sukoba interesa nosioca javne funkcije dovodi i angažman bliskog srodnika u situaciji definisanoj čl. 6, 7. i 11. ovog zakona.

Član 13.

(Ograničenja nakon prestanka javne funkcije)

U periodu od jedne godine od prestanka javne funkcije nosilac javne funkcije ne može:

a) u instituciji na nivou Bosne i Hercegovine u kojoj je obavljao javnu funkciju nastupati kao predstavnik, punomoćnik pravnog lica, ili poduzetnik organizacije koja s tom institucijom ima ili uspostavlja ugovorni, odnosno poslovni odnos;

b) obavljati poslove upravljanja ili revizije u pravnom licu u kojem su dužnosti nosioca javne funkcije bile povezane sa supervizorskim ili kontrolnim poslovima;

c) stupiti u ugovorni odnos ili drugi oblik poslovne saradnje s institucijom na nivou Bosne i Hercegovine u kojoj je nosilac javne funkcije obavljao javnu funkciju;

d) zasnovati radni odnos, uspostaviti poslovnu saradnju s pravnim licem, poduzetnikom ili drugom organizacijom koja ostvaruje korist na osnovu odluke institucije na nivou Bosne i Hercegovine u kojoj je nosilac javne funkcije obavljao funkciju;

e) zastupati pravno ili fizičko lice pred institucijom na nivou Bosne i Hercegovine u kojoj je nosilac javne funkcije za vrijeme obavljanja javne funkcije učestvovao u donošenju odluke;

f) upotrijebiti povjerljivu ili drugu povlaštenu informaciju i obavještenje do kojih je nosilac javne funkcije došao u obavljanju javne funkcije, radi sticanja koristi za sebe ili drugog, ili radi nanošenja štete drugom, osim ako su ta saznanja i obavještenja dostupna javnosti.

Član 14.

(Zabranjena aktivnost nosioca javne funkcije)

Nosiocu javne funkcije u institucijama na nivou Bosne i Hercegovine zabranjeno je:

a) primiti ili zahtijevati poklon ili drugu korist ili obećanje poklona ili druge koristi radi obavljanja javne funkcije;

b) primiti dodatnu naknadu za obavljanje poslova u sklopu obavljanja javne funkcije;

c) tražiti, prihvatiti ili primiti poklon ili uslugu radi glasanja o bilo kojem pitanju ili uticati na odluku nekog organa ili lica;

d) obećati i pogodovati zaposlenju ili nekom drugom pravu u zamjenu za poklon ili obećanje poklona;

e) odbiti uvid u svoje finansijsko stanje prilikom provjere podataka navedenih u Izvještaju o finansijskom stanju i imovini, iz člana 16. ovog zakona;

f) uticati na dobijanje posla ili ugovora o javnim nabavkama, odnosno uticati na angažman pravnog ili fizičkog lica od strane institucije na nivou Bosne i Hercegovine u kojoj obavlja javnu funkciju ili drugog pravnog lica, koristeći uticaj javne funkcije s ciljem sticanja materijalne ili nematerijalne koristi za sebe, povezano lice ili bilo koje drugo lice;

g) koristiti povjerljive ili druge povlaštene informacije o radu državnih organa radi lične koristi ili koristi povezanog lica, i

h) koristiti položaj nosioca javne funkcije kako bi uticao na zakonodavne, izvršne ili sudske vlasti, te tako postigao lični ili finansijski interes, povlasticu, pravo ili sklopio pravni posao za sebe ili povezano lice.

Član 15.

(Primanje poklona)

(1) Poklon se definiše u skladu s članom 4. tačkom h) ovog zakona, s tim da vrijednost poklona predstavlja njegovu tržišnu vrijednost.

(2) Poklon u vrijednosti do 300 KM nosilac javne funkcije može zadržati i ne treba ga prijaviti.

(3) Poklonom, u smislu stava (2) ovog člana smatra se i više poklona učinjenih od istog lica u toku jedne godine. Ukoliko nosilac javne funkcije dobije više poklona od istog lica u toku jedne godine, njihova ukupna vrijednost ne može preći iznos od 300 KM.

(4) Poklon vrijednosti iznad 300 KM nosilac javne funkcije ne može zadržati i obavezan je isti u roku od tri dana od dana prijema prijaviti i predati instituciji na nivou Bosne i Hercegovine koja ga je izabrala ili imenovala i u čije ime obavlja povjerenu javnu funkciju.

(5) Informaciju o predatom poklonu institucija na nivou Bosne i Hercegovine dužna je dostaviti Komisiji u roku od 15 dana od dana prijema poklona.

(6) Nosilac javne funkcije ne može primiti novac, ček ili drugi vrijednosni papir bez obzira na iznos.

(7) U slučaju sumnje u vrijednost poklona nosilac javne funkcije dužan je obratiti se upitom Komisiji, u roku od tri dana od dana prijema poklona.

(8) Primanjem poklona, u skladu s odredbama ovog zakona, smatra se i primanje poklona od strane trećeg lica u korist nosioca javne funkcije.

(9) Komisija će donijeti pravilnik kojim će propisati postupak, način evidentiranja, predaju i čuvanje primljenih poklona na nivou institucija Bosne i Hercegovine.

(10) Komisija je dužna u roku od 90 dana od dana primjene ovog zakona uspostaviti centralni registar poklona nosilaca javnih funkcija u institucijama na nivou Bosne i Hercegovine, primljenih tokom obavljanja javne funkcije.

(11) Centralni registar poklona nosilaca javnih funkcija u institucijama na nivou Bosne i Hercegovine će biti dostupan na službenoj web-stranici Komisije.

POGLAVLJE III IZVJEŠTAJ O FINANSIJSKOM STANJU I IMOVINI

Član 16.

(Dužnost podnošenja izvještaja o finansijskom stanju i imovini nosioca javne funkcije)

(1) Nosilac javne funkcije dužan je Komisiji u roku od 30 dana od dana stupanja na javnu funkciju podnijeti Izvještaj o finansijskom stanju i imovini (u daljnjem tekstu: Izvještaj), za sebe i bliske srodnike, u skladu sa stanjem na dan izbora ili imenovanja.

(2) Izvještaj sadrži lične podatke nosioca javne funkcije i njegovih bliskih srodnika, uključujući JMB, podatke o funkciji koju nosilac javne funkcije obavlja, te podatke o:

- a) pravu vlasništva nad nepokretnim stvarima u zemlji i inostranstvu;
- b) pravu vlasništva nad pokretnim stvarima koje podliježu registrovanju kod nadležnih organa u zemlji i inostranstvu;
- c) pravu vlasništva nad drugim pokretnim stvarima pojedinačne vrijednosti veće od 5.000 KM (dragocjenosti, zbirke, umjetnine, predmeti i sl.);
- d) depozitima u bankama i drugim finansijskim organizacijama, u zemlji i inostranstvu;
- e) dionicama i udjelima u pravnom licu i drugim vrijednosnim papirima;
- f) pravima na osnovu autorskih, patentnih i sličnih prava intelektualnog vlasništva;
- g) dugovima (glavnica, kamata i rok otplate);
- h) izvoru i visini neto prihoda od obavljanja javne funkcije;
- i) potraživanjima (glavnica, kamata);
- j) izvoru i visini drugih neto prihoda;
- k) drugim poslovima i djelatnostima koje obavlja u skladu sa zakonom;
- l) članstvu u organima nevladinih, neprofitnih organizacija;
- m) druge podatke i dokaze koje nosilac javne funkcije smatra bitnim za primjenu ovog zakona.

(3) Nosilac javne funkcije dužan je u Izvještaju navesti tačne i potpune podatke, u skladu s tržišnom vrijednosti imovine iz stava (2) ovog člana, na dan podnošenja Izvještaja.

(4) Nosilac javne funkcije dužan je Komisiji u toku obavljanja javne funkcije podnijeti:

- a) Izvještaj jednom tokom godine, najkasnije do 31. marta tekuće godine za prethodnu godinu;
- b) ažuriran Izvještaj na zahtjev Komisije u slučaju pokretanja postupka za utvrđivanje povrede odredaba ovog zakona, u roku od 30 dana od dana prijema zahtjeva.

(5) Nosilac javne funkcije dužan je u roku od 30 dana od dana prestanka obavljanja javne funkcije Komisiji dostaviti obavijest o prestanku obavljanja javne funkcije i Izvještaj podnijeti godinu dana nakon prestanka obavljanja javne funkcije.

(6) Komisija će donijeti pravilnik kojim se uređuju način podnošenja i izgled obrasca za podnošenje Izvještaja iz st. (2) i (4) ovog člana.

(7) Komisija je dužna u roku od 90 dana od dana primjene ovog zakona uspostaviti i voditi Javni registar imovine nosilaca javnih funkcija u institucijama na nivou Bosne i Hercegovine, u koji će evidentirati izvještaje nosilaca javnih funkcija.

(8) Podaci iz Javnog registra imovine nosilaca javnih funkcija u institucijama na nivou Bosne i Hercegovine će se objaviti na službenoj web-stranici Komisije. S ciljem sprečavanja zloupotrebe, lični podaci nosilaca javne funkcije, njihovih bliskih srodnika i povezanih lica štite se u skladu s važećim propisima o zaštiti ličnih podataka.

(9) Ako nosiocu javne funkcije nisu dostupni podaci o imovini i prihodima bliskih srodnika iz stava (1) ovog člana ili se smatraju poslovnom tajnom kod određenog poslodavca, nosilac javne funkcije je dužan Komisiji dostaviti izjavu na navedene okolnosti, koja je ovjerena kod nadležnog organa uprave.

Član 17.

(Provjera podataka iz Izvještaja)

(1) Komisija vrši provjeru tačnosti i potpunosti podataka iz Izvještaja nosioca javne funkcije.

(2) Postupak prikupljanja i provjere podataka, Komisija će propisati Pravilnikom o prikupljanju i postupku provjere podataka iz Izvještaja o finansijskom stanju i imovini nosilaca javnih funkcija.

(3) Institucije, organi i pravna lica će saradivati sa Komisijom prilikom dostavljanja podataka o imovini i prihodima nosioca javnih funkcija, institucijama čiji je rad regulisan zakonima o bankama, te će potvrditi da li stanje računa koje je navedeno za određeni datum odgovara stvarnom stanju računa na taj datum, kao i da li lica obuhvaćena izjavom imaju neprijavljen račun ili drugi finansijski proizvod kod te institucije.

(4) Postupak provjere podataka iz Izvještaja zatvoren je za javnost do donošenja pravosnažne odluke.

POGLAVLJE IV KOMISIJA ZA ODLUČIVANJE O SUKOBU INTERESA U INSTITUCIJAMA NA NIVOU BOSNE I HERCEGOVINE

Član 18.

(Osnivanje Komisije)

(1) Za provođenje ovog zakona osniva se Komisija za odlučivanje o sukobu interesa u institucijama na nivou Bosne i Hercegovine, sa sjedištem u Istočnom Sarajevu.

(2) Komisija je stalno i nezavisno tijelo koje je uspostavila Parlamentarna skupština Bosne i Hercegovine i koje obavlja poslove iz svog djelokruga rada i nadležnosti propisanih ovim zakonom.

(3) Agencija za prevenciju korupcije i koordinaciju borbe protiv korupcije (u daljnjem tekstu: Agencija) osigurava obavljanje stručnih, administrativnih i materijalno-finansijskih poslova za potrebe Komisije, te druge neophodne organizacione i tehničke uslove za rad Komisije.

(4) Komisija ima sedam članova koje imenuje Parlamentarna skupština Bosne i Hercegovine. Članovi Komisije se imenuju na osnovu kompetencija, ugleda i stručnosti. U postupku imenovanja Parlamentarna skupština Bosne i Hercegovine osigurava da sastav Komisije odražava jednaku zastupljenost Bošnjaka, Hrvata i Srba, kao konstitutivnih naroda, uz osiguranje jednog člana ostalih, u skladu s Ustavom Bosne i Hercegovine.

(5) Za člana Komisije ne može biti imenovano lice koje je nosilac javne funkcije.

(6) Članovi Komisije se imenuju na način i u postupku utvrđenom odredbama Zakona o ministarskim imenovanjima, imenovanjima Vijeća ministara i drugim imenovanjima Bosne i Hercegovine („Službeni glasnik BiH“, broj 7/03).

Član 19.

(Postupak izbora i mandat članova Komisije)

(1) Članovi Komisije se biraju na osnovu javnog oglasa.

(2) Postupak oglašavanja i utvrđivanja prijedloga kandidata provodi Zajednička komisija za administrativne poslove Parlamentarne skupštine Bosne i Hercegovine.

(3) Odluka o listi uspješnih kandidata donosi se dvotrećinskom većinom glasova članova Zajedničke komisije za administrativne poslove Parlamentarne skupštine Bosne i Hercegovine koji su prisutni na sjednici i glasaju.

(4) U slučaju da nije moguće postići većinu propisanu stavom (3) ovoga člana, odluka o listi uspješnih kandidata donosi se većinom glasova članova Zajedničke komisije za administrativne poslove Parlamentarne skupštine Bosne i Hercegovine koji su prisutni na sjednici i glasaju, uz nastojanje da najmanje jedan glas bude iz reda članova koji su iz opozicije.

(5) Članovi Komisije se imenuju na mandat od pet godina, i isti se ne može obnoviti.

(6) Mandat članova Komisije počinje stupanjem na snagu akta o imenovanju.

(7) Mandat članova Komisije kraći od dvije godine i šest mjeseci ne smatra se mandatom u smislu stava (5) ovog člana.

Član 20.

(Dužnosti članova Komisije)

(1) Nakon imenovanja član Komisije je dužan da podnese i javno objavi na službenoj web-stranici Komisije Izvještaj o finansijskom stanju i imovini, u skladu s članom 16. ovog zakona.

(2) Članovi Komisije obavljaju poslove iz svog djelokruga rada i imaju nadležnosti propisane ovim zakonom.

(3) Zabranjen je svaki oblik uticaja na rad Komisije koji bi mogao ugroziti samostalnost i nezavisnost u donošenju odluka Komisije.

Član 21.

(Sredstva za rad i pečat Komisije)

(1) Sredstva za rad Komisije osiguravaju se u budžetu institucija Bosne i Hercegovine i međunarodnih obaveza Bosne i Hercegovine, na poziciji Agencije.

(2) Komisija ima svoj pečat u skladu s odredbama propisa o pečatu institucija Bosne i Hercegovine.

Član 22.

(Način rada i odlučivanja Komisije)

(1) Komisija donosi odluke na sjednicama Komisije.

(2) Komisija je dužna održati najmanje jednu sjednicu tokom mjesec dana.

(3) Kvorum za rad Komisije čini pet članova Komisije.

(4) Komisija odlučuje većinom glasova od ukupnog broja članova Komisije.

(5) Odluku o inicijativi za razrješenje sa dužnosti i pozivu za podnošenje ostavke, Komisija donosi konsenzusom, a ako ne postigne konsenzus, Komisija donosi odluku 2/3 većinom glasova od ukupnog broja članova Komisije.

(6) Konačna odluka Komisije mora biti objavljena na internetskoj stranici Komisije, ako ovim zakonom nije drugačije propisano

(7) Ako član Komisije neopravdano izostane dva puta sa sjednice Komisije, Parlamentarna skupština Bosne i Hercegovine će u roku od 30 dana pokrenuti postupak za njegovo razrješenje, i u roku od 60 dana imenovati novog člana.

(8) Predsjedavajući Komisije je dužan u roku od tri dana, od drugog neopravdanog izostanka člana Komisije sa sjednice, izvijestiti Zajedničku komisiju za administrativne poslove Parlamentarne skupštine Bosne i Hercegovine, radi pokretanja postupka razrješenja i izbora novog člana Komisije, u skladu s članom 19. ovog zakona.